

Talantli, tirishqoq talabalar taqdirlandi

Bugungi kunda O'zbekiston Respublikasi Prezidenti, Yurtboshimiz Shavkat Mirziyoyev Miromonovich tomonidan mamlakatimiz yoshlariga juda ham katta imkoniyatlar yaratib berilmoqda. Jumladan, 2020-yil 25-dekabr kuni Prezidentimiz Shavkat Mirziyoyev Miromonovich tashabbusi bilan tashkil etilgan, mamlakatimiz yoshlari bilan o'tkazilgan "O'zbekiston yoshlari forumi 2020" katta tadbirini barchamiz ko'rib, guvohi bo'ldik. Ushbu Forum O'zbekiston Respublikasida birinchi marotaba tashkil etildi hamda mamlakatimiz yoshlari tomonidan ijobiy kutib olindi.



"O'zbekiston yoshlari forumi"da Yurtboshimiz Shavkat Miromonovich yoshlarga qarata "Men har gal yoshlarimiz bilan uchrashganimda, sizlarning g'ayrat-shijoatingizdan kuch-quvvat olaman, ko'nglim tog'day ko'tariladi. Har biringiz jonajon Vatanimiz va xalqimizga sidqidildan xizmat qilish orzusi bilan yonib yashayotganingizni yaxshi bilaman. Sizlarni O'zbekistonning eng katta boyligi, bebaho xazinasi sifatida yuksak qadrlayman. Barchangiz yaxshi bilasiz, biz bugun o'z oldimizga ulkan marralarni qo'yganmiz. Ona Vatanimizda Uchinchi Renessans poydevorini yaratishga kirishdik. Biz oila, maktabgacha ta'lim, maktab va oliy ta'limni hamda ilmiy-madaniy dargohlarni bo'lg'usi Renessansning eng muhim bo'g'inlari deb hisoblaymiz. Shu sababli, ushbu sohalarda tub islohotlarni izchil amalga oshirmoqdamiz. Ishonamanki, mamlakatimiz taraqqiyotining yangi poydevorini yaratishda sizlar singari fidoyi va vatanparvar yoshlarimiz faol ishtirok etib, munosib hissa qo'shadilar." deya o'z nutqlarida aytib o'tdilar. Xabaringiz bor, 2021-yil nomi "Yoshlarni qo'llab-quvvatlash va aholi salomatligini mustahkamlash yili" deb e'lon qilingani ham Yoshlar bugungi kunda jamiyatimizning eng muhim qatlami ekanligidan, ularni bo'lgan e'tibordan dalolat beradi. "Yoshlarga e'tibor kelajakka e'tibordir". Respublikamiz barcha hududlarida yoshlar e'tibor markazida bo'lib, uchrashuv va tadbirlar o'tkazilmoqda. Bugun 2021-yil 22-yanvar kuni institutimizda faoliyat olib borayotgan O'zbekiston Yoshlar ittifoqining boshlang'ich tashkilot fakultet yetakchilari, faol va tashabbuskor talabalar bilan Yoshlar bilan ishlash bo'yicha prorektor Ruzimurot Choriev ochiq muloqot o'tkazib, talabalar bilan samimiy suhbatlashdi.



Dastavval, jamoat va tashkiliy ishlarda faol ishtirok etgan bir guruh talabalar, barcha fakultet yetakchilariga institut rektori tomonidan berilgan rag'batlantirish pul mukofotlari talabalarga tantanali topshirildi. Keyin esa, har bir fakultet yoshlar yetakchilari yoshlar bilan ishlash va ma'naviy-ma'rifiy ishlar samaradorligini oshirish bo'yicha o'z takliflari va fikrlarini berishdi. Zalda yig'ilgan faollar o'z takliflari, yangi loyihalari va muammolarini aytib o'tishdi. Har bir aytilgan taklif, tashabbus va muammo yozib olindi va rejalarga kiritilishi belgilab olindi. Shu yerning o'zida yechimini topgan masalalar ham bo'ldi. Yuzma yuz uchrashuv samarali va foydali bo'ldi.



Talabalar bilan muloqotda institut yoshlar bilan ishlash va ma'naviyat-ma'rifat bo'limi, fakultet yoshlar bilan ishlash bo'yicha dekan muovinlari, institut psixologi, institut matbuot kotibi, institut yoshlar ittifoqi yetakchilari, iqtidorli talabalarni qo'llab-quvvatlash bo'limi hodimlari ham ishtirok etishdi. Yoshlar bilan ishlash bo'yicha prorektorimiz tashabbusi bilan tashkil etilgan "Eng faol 1000 nafar talabalar" guruhi a'zolari bilan institut rektori uchrashuvi bo'lishini prorektorimiz ta'kidlab o'tdi. O'z vaqtini ayamay tashrif buyurgan va suhbatlashgan rahbarlarimizga talabalar nomidan rahmat aytamiz. Faol bo'ling aziz talabalar. Berilgan vaqt va imkoniyatlardan unumli foydalaning.